

nellement auprès du tres- maictueux & tout - Puissant.

LE CHAPITRE DV MISERICORDIEUX, contenant dix-huict versets, escrit à la Medine.

AV Nom de Dieu clement & misericordieux. Le misericordieux a enseigné l'Alcoran, il a créé l'homme & luy a donné l'usage de la raison, il a créé le Soleil & la Lune pour compter les saisons; les estoiles & les arbres l'adorent, il a esleué les Cieux, il a estably la iustice, & a ordonné de peser a bon poids, il a créé la terre pour l'abitation des hommes, & toute sorte de fruiets, de grains & de feüilles, il a créé les vents & les tourbillons, ô (hommes & Demons) quel Seigneur reniez- vous autre que vostre Seigneur? Il a créé l'homme de terre comme vn pot, & a créé les Demons de la flamme du feu, quel Seigneur reniez- vous autre que vostre Seigneur? Il est Seigneur des deux Ponans & des deux Leuans, quel Seigneur reniez- vous autre que vostre Seigneur? Il fait mesler l'eau douce avec l'eau salée, & l'vne se mesle facilement l'vne avec l'autre, quel Seigneur reniez vous autre que vostre Seigneur? Il fait sortir de la mer les perles & le corail, quel Seigneur reniez vous autre que vostre Seigneur? il a créé les nauires qui coulent sur

la mer gros comme des montagnes, quel Seigneur reniez vous autre que vostre Seigneur? Toute chose prendront fin, & la face de ton Seigneur maiestueuse & glorieuse sera permanente, quel Seigneur reniez vous autre que vostre Seigneur? Tout ce qui est au Ciel & en la Terre demande sa grace, il est toujours luy-mesme, quel Seigneur reniez vous autre que vostre Seigneur? O hommes & Demons ie vous demanderay compte de vos actions, quel Seigneur reniez vous autre que vostre Seigneur? O hommes & Demons sortez des extremitez du Ciel & de la Terre, outrepasséz-les si vous pouuez, vous n'en n'avez pas le pouuoir, quel Seigneur reniez vous autre que vostre Seigneur? S'il enuoye contre vous des flammes sans fumée, & de la fumée sans feu, vous ne vous en pourrez pas deffendre, quel Seigneur reniez vous autre que vostre Seigneur? Lors que le Ciel s'ouure il semble vne rose ou vne peau rouge cramoisi, quel Seigneur reniez vous autre que vostre Seigneur? Le temps viendra qu'on demanderera compte aux hommes & aux Demons de leurs pechez, quel Seigneur reniez vous autre que vostre Seigneur? Les meschans seront cognus à leur fizionomie, on leur demandera compte de leur promptitude & de leur negligence, quel Seigneur reniez vous autre que vostre Seigneur? Voila l'Enfer que les meschans n'ont pas voulu croire, ils tourneront à l'entour & à l'entour d'vne eauë bouillante de laquelle ils beuront, quel Seigneur reniez vous autre que vostre Seigneur?

Ceux

Ceux qui auront eu la crainte de Dieu deuant les yeux entreront dans des iardins où les arbres sont couverts de branches & de feuilles, ornez de ruisseaux & de fontaines avec abondance de toute sorte de fruits, quel Seigneur reniez vous autre que vostre Seigneur ? Ils seront appuyez sur de beaux lits doublez de rouge cramoisy, quel Seigneur reniez vous autre que vostre Seigneur ? Ils cueilleront des fruits de ces iardins à leur contentement, quel Seigneur reniez vous autre que vostre Seigneur ? Il y auront des femmes qui ne ietteront la veüe que sur eux, & que personne ne touchera ny homme ny Ange auparauant eux, quel Seigneur reniez vous autre que vostre Seigneur ? elles sembleront du corail & des rubis, quel Seigneur reniez vous autre que vostre Seigneur ? Les bien-faits sont recompensez par des bien-faits, quel Seigneur reniez vous autre que vostre Seigneur ? Il y a encore d'autres iardins où il y a des herbes grandement vertes, des fleues, des dattes, des grenades & toute sorte de fruits, quel Seigneur reniez vous autre que vostre Seigneur ? Il y a dans ces iardins des femmes qui ont les yeux tres-noirs & le corps tres-blanc, elles sont couvertes de pauillons, & personne ny hommes ny Anges ne les toucheront auparauant leurs matis, quel Seigneur reniez vous autre que vostre Seigneur ? Elles seront appuyées sur des tapis verds auprès des ruisseaux bordez de fleurs, quel Seigneur reniez vous autre que vostre Seigneur ?

Loüé soit le nom de Dieu ton Seigneur, honneur
& gloire luy sont dûes eternellement.

*LE CHAPITRE DV JVGEMENT,
contenant quatre-vingts dix-neuf versets,
escrit à la Medine.*

AV nom de Dieu clement & misericordieux.
Le iour du Iugement arriuera, personne ne le
peut denier; Ce iour plusieurs seront affligez & hu-
miliez, & plusieurs seront esleuez & resiouys, la terre
tremblera, les montagnes s'ouuiront, & seront dis-
persées côme la poussiere que le vent emporte, vous
assisterez à ce iour du Iugement en trois façons, les
vns auront en leur main droicte le liure où seront
escrites toutes leurs actions, les autres l'auront en leur
main gauche, & ceux qui les ont precedez à bien fai-
re seront les plus proches de sa diuine Majesté & les
plus esleuez en Paradis, il y en aura vn grand nom-
bre des premiers siecles, & peu des derniers, ils seront
appuyez sur des liëts ornez d'or & de pierreries, ils se
regarderont tous en face, de ieunes enfans iront à
l'étour d'eux avec des vases, des tasses & des gobelets,
remplis d'vn breuage delicieux, qui ne leur fera
point de mal à la teste, & qui ne les enyurera pas, ils
auront tous les fruiëts qu'ils pourront souhaiter, &

*Ce sont les
bien-heu-
reux.*

*Ce sont les
damnez.*

*Ce sont les
Propheetes*